

5. OKTOBAR/LISTOPAD 2009.  
BROJ 129

www.magazinaura.net

# aura

GODINA VII

Magazin za zdraviji život • Kultura življenja • Alternativna medicina • Sadržaj



Elmir Kulenović, direktor  
prodaje u Zepteru, nakon  
što je izliječio dijabetes

Nebojša Stanojević,  
prvi Bosanac koji će  
letjeti u svemir

# Novčić ga odveo na put OKO SVIJETA



DANAS JE ČOKOLADA  
MOJA JEDINA OVISNOST

MISTERIJE O KRPENOJ LUTKI

KO JE UKLETA ANABELA?



Nebojša Stanojević, prvi Bosanac koji će letjeti u svemir



# Novčić ga odveo na put oko svijeta

Početak avgusta 2010. godine vođa tima „Synergy Moon“, rođeni Sarajlija sa mjestom prebivališta u Južnoj Africi, Nebojša Stanojević, ostvarit će svoj san letom u svemir

**B**io je 12. april 1961. godine. Toga dana Rusi su šokirali Ameriku. Jurij Gagarin prvi je čovjek koji se vinuo u beskrajno prostranstvo svemira. Mnogi će reći kako Gagarin nije prvi čovjek u svemiru, nego tek prvi koga su iz svemira uspjeli vratiti. Pola stoljeća nakon toga historijskog leta, Bosna i Hercegovina dobit će svog Gagarina u liku Nebojše Stanojevića. Kada smo ga pitali za njegovu biografi-

ju, nasmijao se i kazao: - 13. avgusta 1969. godine moja mama je iz Tuzle došla u Sarajevo u posjetu svojim. Toga dana sam i ja rođen. Tako da sam rođeni Sarajlija - kroz smijeh govori Nebojša dok nas polako uvodi u svoj život pun avantura, ostvarenih snova, proputovanih kontinenta, mora i okeana. Inače, ovaj moreplovac i svjetski putnik našoj javnosti poznat je po tome što je 2004. godine pokrenuo prvu bosanskohercegovačku

ekspediciju oko svijeta. Putovanje je trajalo sedam mjeseci i bilo dugo oko 10 hiljada kilometara.

## Putevi do dalekih zemalja

Svoje djetinjstvo Nebojša je proveo u Tuzli gdje je završio srednju školu. Poslije srednje, upisao je Prirodno-matematički fakultet u Novom Sadu. Kako kaže, nije mu išlo... Odlučio je podignuti sidro.

- Prva destinacija bila je Grčka. Nisam mogao ni zamisliti kako će taj put biti moja životna prekretnica. U to vrijeme, počeo je rat u Bosni i Hercegovini. Kod sebe sam imao pasoš ta-

dašnje države Jugoslavije. Odlučio sam da krenem na put po svjetskim zemljama van Evrope. Međutim, jedine dvije zemlje u koje sam mogao otići, a da mi ne treba viza, bile su Indija u Aziji i Zimbabve u Africi.

Kako se nije mogao odlučiti između ove dvije egzotične zemlje, Nebojša se odlučio na potez koji će riješiti njegovu nedoumicu.

- Uzeo sam novčić. Pismo je bila Indija, a glava Zimbabve. Bacio sam i čekaio sekundu. Bila je glava, što je značilo put u Zimbabve, zemlju u južnom dijelu Afričkog kontinenta. Da je bila Indija, vjerovatno bi

## Poruka svemircima

Nebojša je uvjeren kako postoje i druga bića van naše galaksije, te dodaje kako bi bilo glupo misliti da „gore“ nema nikog drugog.

- Ja ne vjerujem u one male „zelenne“ svemirce kako nam ih predstavlja Holivud. Međutim, s obzirom na beskonačnost svemira, mislim da život postoji i van naše galaksije.

Na pitanje kakva bi njegova reakcija bila da sretne nekog svemirca, recitirao nam je poznatu pjesmu „Svemirci“ od repera Ede Maajke.

- Pitao bih ga dal' vjeruju u Boga, da li uzimaju droga, da li ima smoga i kod njih na planetu, zašto toliko paze na svoju diskreciju... Hehehe... - kaže Nebojša te poručuje starijim ljudima da obrate pažnju na mlađe, a za one mlađe da uzmu stvari u svoje ruke i da uče, uče i uče...



U toku svojih putovanja doživljavao je bliske susrete sa egzotičnim životinjama

## Kralj im poklonio otok



**Kralj George Tupou V. poklonio je timu Synergy Moon otok za lansiranje robota**

Put koji su mnogi nazvali „putovanje stoljeća“ kreće sa otoka Eua, najjužnijeg otoka pacifičke Kraljevine Tonge. Kralj ove države, George Tupou V, timu „Synergy Moon“ dodijelio je na poklon otok Eua na kome će se vršiti i lansiranje robota „Tesla“ na Mjesec.

- Po svom geografskom položaju, ovaj otok je savršen za lansiranje robota i rakete. Meni će u letu u svemir društvo pravit i Miroslav Ambruš-Kiš, novinar Večernjeg lista. Na ovakvo putovanje čekaju mnoge holivudske zvijezde kao što su Brad Pitt, Angelina Jolie i Madonna.

Svi oni koji budu željeli otići na ovakvo putovanje, moraju izdvojiti 800 hiljada dolara za jedan let u kapsuli koja će ponijeti pet putnika - turista s vođom puta i naravno da sačekaju do 2012. godine kada su predviđena prva svemirska komercijalna putovanja.

- Ovaj let u svemir je dokaz da ja zaista živim svoje snove, ja ih ne sanjam. Jedan od mojih jako dobrih prijatelja je rekao divnu rečenicu: „Ja nisam sanjar, ja sam direktor svojih snova“ i zaista je tako... - kazao je Stanojević.


danas sve bilo drugačije - sjeća se Nebojša vremena od prije 17 godina.

- Međutim, kada sam došao dole, vidio sam da to nije to. Jednostavno, nije bilo sigurno za život. Zajedno sa još jednim prijateljem kojeg sam upoznao na aerodromu u Harareu (glavnom gradu Zimbabvea) ušao sam u autobus i krenuo u potra-

gu za boljim mjestom. Autobus je bio isti kao onaj iz filma „Ko to tamo peva“ u kojem su sa ljudima bile i razne egzotične životinje - kaže Nebojša koji je tada imao tek 23 godine.

### Iz Afrike u svemir

Na tom putu, Nebojša se „skrasio“ u Cape Townu u Južnoafričkoj Republici



gdje već nekoliko godina vrjedno radi na najvećem i najvrijednijem projektu nazvanom „Synergy Moon“ čiji je vođa.

- Tim „Synergy Moon“ sastavljen je od tridesetak stručnjaka sa ciljem komercijalizacije letova u svemir. Dakle, mi ćemo omogućiti običnim ljudima da se vinu u svemirska prostranstva. Paralelno radimo i na projektu slanja robota na Mjesec. Naš let u svemir, koji će se desiti u toku 2011. godine, trajat će 12 sati i letjet ćemo brzinom od 25 do 30 hiljada kilometara na sat. Napraviti ćemo deset krugova oko Zemlje i spustit ćemo se negdje u Pacifiku - kaže presretni Nebojša te dodaje kako još uvijek nema straha.

- Nema straha! Malo je reći da sam uzbuđen. Svjesni smo koliko je to opasno. Možda smo malo ljudi, ali nismo glupi. Radimo sve kako bi rizik sveli na minimum. Ova prilika je jedinstvena i sa velikom sigurnošću mogu reći da se ona pruža samo sretnima, a ja sam jedan od njih!

„Svemirski“ san ovog Bo-

sanca ne završava se na njegovom letu. Tim od 150 svjetskih stručnjaka pravi robot po imenu „Tesla“ kojeg planiraju poslati u svemir. Društvo „Tesli“ pravit će, ni manje ni više, nego burek.

- Ideja o slanju bureka na Mjesec je potekla od članova ekipe „Top lista nadrealista“, vizionara svog vremena. Također, ovo će biti svojevrsan marketinški potez na promociji Bosne i Hercegovine. Amerikanci su do sada na Mjesec slali Coca Colu i McDonald's, zašto i mi ne bismo mogli poslati nešto što je obilježje naše države. Mislim da je burek izvrstan predstavnik! Još uvijek nismo odlučili da li ćemo ga ostaviti gore ili ćemo ga vratiti. Ako se vrati, biće to prvi bh. burek iz svemira - kaže 40-godišnji avanturista koji na kraju našeg razgovora dodaje:

- Ja sam sve svoje snove ostvario! Ovo je tačka na sve ono što sam radio i želio. Poslije tog putovanja okrenut ću se prema humanitarnim akcijama i zalaganju na edukaciji i dobrobiti mladih ljudi!

**Jasmin HADŽIAHMETOVIĆ**



**Nebojša Stanojević i Azur Dervišagić, članovi tima „Synergy Moon“**